

Transkript sa konferencije za medije međunarodnih organizacija



*OHR, Mario Brkić
ICTY, Matias Hellman*

OHR

Schwarz-Schilling, Solana i Rehn će razgovarati o anti-Daytonskoj retorici

Visoki predstavnik i specijalni predstavnik Evropske unije Christian Schwarz-Schilling trenutno se nalazi u Briselu gdje će se susresti sa Javierom Solanom, visokim predstavnikom Evropske unije za zajedničku vanjsku i sigurnosnu politiku, i Olliem Rehnem, komesarom za proširenje, kako bi ih prije februarskog sastanka Vijeća za implementaciju mira izvijestio o situaciji u Bosni i Hercegovini.

Jedno pitanje o kojem će se razgovarati na sastancima koji su zakazani za sutra je sve prisutnije korišćenje anti-Daytonske retorike, kako u Bosni i Hercegovini tako i širem regionu.

Ured visokog predstavnika će pomno pratiti sve anti-Daytonske izjave pred naredni sastanak Vijeća za implementaciju mira na kojem će se donijeti konačna odluka o zatvaranju OHR-a te je

primio k znanju, među drugim primjerima, i komentare srbijanskog ministra vanjskih poslova Vuka Draškovića i premijera Koštunice u kojima se dovode u vezu sudbina Republike Srpske, koja je integralni dio Bosne i Hercegovine, i Kosova.

Srbija je potpisnica Daytonskog mirovnog sporazuma i treba se tako i ponašati. Pokušaji ugrožavanja Daytonu predstavljaju prijetnju Republici Srpskoj, pošto je njeno postojanje kao entiteta zvanično priznato mirovnim sporazumom.

Unutrašnja organizacija Bosne i Hercegovine definirana ustavom te zemlje se može promijeniti u skladu sa odredbama sadržanim u njemu, a to znači putem unutrašnjeg demokratskog procesa i dogovora svih naroda i ključnih faktora.

Sablast trećeg entiteta u prošlosti

OHR je primio k znanju intervju koji je premijer Republike Srpske Milorad Dodik dao današnjem Večernjem listu i njegovo zalaganje za treći entitet.

Ovaj poziv ponovo oživljava sablasti prošlosti što nije donijelo bilo kakve koristi hrvatskom narodu u Bosni i Hercegovini. Bilo bi bolje da gospodin Dodik svoju energiju posveti procesima reformi koji će BiH približiti euro-atlantskim integracijama.

Međunaroda zajednica je često naglašavala da neće tolerirati bilo kakav pokušaj ugrožavanja Daytonskog mirovnog sporazuma. Upravni odbor Vijeća za implementaciju mira je u više navrata jasno stavio do znanja da je Bosna i Hercegovina priznata suverena država čiji teritorijalni integritet garantira Daytonski mirovni sporazum.

OHR očekuje da će kanton 7 sutra imenovati delegate za Dom

naroda

Prošle sedmice su se stranke izabrane u Kantonalnu skupštinu Hercegovačko-neretvanskog kantona dogovorile da sutra održe sjednicu na kojoj će imenovati kantonalne delegate u Dom naroda FBiH.

Kao što je poznato, Hercegovačko-neretvanski kanton je jedini kanton koji nije otpočeo process izbora delegata u Dom naroda FBiH. Delegati u Skupštini i političke stranke koje predstavljaju moraju osigurati da se u potpunosti ispune zakonski uslovi koji se tiču njihovih funkcija.

Dom naroda FBiH se mora sazvati što je prije moguće kako bi mogao usvojiti odluku o privremenom finansiranju, čime bi se spriječila ozbiljna finansijska kriza u FBiH. Dom naroda takođe mora dostaviti svoje nominacije za Dom naroda BiH kako bi se mogao oformiti državni Parlament.

Prema Ustavu Federacije BiH, Dom naroda ima obavezu da se sastane u roku od 20 dana od dana objavljivanja izbornih rezultata. U slučaju da Skupština kantona 7 sutra ne imenuje delegate u Dom naroda OHR očekuje da se sjednica Doma naroda sazove što je prije moguće, čim bude potvrđen dovoljan broj delegata da bi postojao kvorum.

U skladu sa pravnim tumačenjem Ustava Federacije, koje je dao OHR, Dom naroda FBiH može održati konstituirajuću sjednicu sa prostom većinom delegata koje su imenovali kantoni u FBiH. Prosta većina se postiže kada je imenovano preko 50 posto delegate, to jest ukupno 30 delegata.

ICTY

Dobar dan svima iz Haškog tribunala.

Jutros u 9 sati je u Hagu pred Pretresnim vijećem broj I počela rasprava u predmetu Dragana Zelenovića na kojem se

razmatra zajednički prijedlog odbrane i optužbe za prihvatanje sporazuma o izjašnjavanju o krivici. Prema tom sporazumu, Zelenović bi priznao krivicu za neke od zločina kojima se tereti. Optužba bi tražila kaznu u rasponu od 10 do 15 godina i odbrana bi tražila kaznu u rasponu od 7 do 10 godina.

Sudije su danas postavile strankama mnoštvo pitanja u vezi predloženog sporazuma, i rasprava po ovom pitanju će se nastaviti sutra u 9.15 sati ukoliko stranke danas dostave pretresnom vijeću aneks koji bi pojasnio sadržaj sporazuma.

Zelenović je jedan od grupe optuženih koji su u Hagu optuženi za silovanja i mučenje bošnjačkih žena u Foči 1992. godine. Pred Tribunalom su ranije trojica optuženih osuđena za iste ili slične zločine, a predmeti protiv Radovana Stankovića i Gojka Jankovića su prosljeđeni Sudu BiH. Za Zelenovića također postoji zahtjev tužilaštva za prosljeđivanje predmeta Bosni i Hercegovini, ali to bi se moglo promijeniti ukoliko Zelenović prizna krivicu pred Tribunalom.

Želim naglasiti da Pretresno vijeće nema obavezu da prihvati takav sporazum i u svakom slučaju nije ni na koji način vezano prijedlozima o visini kazne. Odštampao sam za Vas relevantne odredbe iz pravilnika Tribunala.

Svi zainteresovani novinari mogu naravno kontaktirati nas danas i sutra da bi dobili najnovije informacije i relevantne dokumente vezane za ovaj predmet.

Sada ću preći na drugu današnju temu. Manje od dva mjeseca nakon što je Stanislav Galić pravomoćno osuđen na doživotni zatvor zbog vođenja kampanje terora nad stanovnicima Sarajeva, počelo je suđenje Dragomiru Miloševiću, koji je naslijedio Galića na mjestu komandanta Sarajevsko-Romanijskog korpusa VRS. Optužba ima 180 sati za izvođenje dokaza protiv Miloševića i namjerava pozvati 104 svjedoka. Očekuje se da će se dokazni postupak optužbe završiti početkom aprila. U svom uvodnom izlaganju Tužilaštvo je najavilo da namjerava dokazati

da su sarajevski civili bili namjerno gađani i da su zapravo oni, a ne vojni ciljevi, bili glavna meta SRK. O eventualnoj krivici optuženog naravno odlučuju sudije nakon što su saslušale dokaze odbrane i optužbe.

Mogu emailom dostaviti zainteresovanim novinarima tekst uvodnog izlaganja tužilaštva na engleskom jeziku, a ako neku televizijsku kuću interesuju video materijali iz ovog predmeta, molim Vas da me kontaktirate pa ćemo vidjeti šta možemo učiniti.

Hvala na pažnji, to je sve od mene danas.

Novinarska pitanja

Danka Polovina-Mandić, Dnevni list:

Rekao si da će visoki predstavnik govoriti o sveprisutnijoj antidejtonskoj retorici. Možeš li išta konkretnije reći? Ko, kada, gdje?

OHR:

Naveo sam dva primjera. Bilo je toga puno i ranije.